

東
華
續
錄

東華續錄

臣周瀚蕃恭校

乾隆十六年辛未春正月庚子以初次南巡免江蘇安徽元年至
十三年逋賦浙江本年額賦三十萬兩○減直省緩決三次以上
人犯○以上年巡幸嵩洛免河南十四年以前逋賦○癸卯諭江
蘇釐革催徵積弊○乙巳 上臨和敬公主第○丙午諭湖北巡
撫卽著嚴瑞龍署理嚴瑞龍在布政使中厯任已久前因安徽巡
撫缺出朕已向軍機大臣等降旨令嚴瑞龍署理旋憶伊前次來
京陛見時觀其人不過循謹奉職非出色之員且向日張廷玉曾
在朕前屢次保薦恐伊未必卽能勝任是以改用定長今觀唐綬
祖貪婪敗檢該督永興令其密查皆能據實查明揭報永興來京

後嚴瑞龍復具摺續參且稱伊業經奏請陞見但該督旣已前來
伊若同時來京則唐綏祖惟所欲爲吏治將不可問是嚴瑞龍能
以地方公事爲重頗知大體甚屬可嘉若謂嚴瑞龍參劾巡撫卽
用伊爲巡撫此則不然唐綏祖之劣蹟永興已爲先發其款據俱
一一明確嚴瑞龍之秉公據實自可膺封疆之寄設令挾私傾陷
則必不能逃朕洞鑒也若謂其爲張廷玉所薦則張廷玉罪由自
取至其所薦之人朕豈盡皆不用耶朕之辦理政務一出於大公
至正全無成心卽此可見並將此宣諭中外諸臣共勵亮工之誼
自邀鑒用之恩其所遺布政使員缺著朱一蜚調補廣東布政使
員缺著石柱補授○免甘肅元年至十年逋賦○丁未調周人驥
爲湖南布政使張若震爲西安布政使○辛亥 上奉 皇太后
南巡啓鑒○癸丑免經過直隸山東地方本年額賦十分之三○

命截留河南粟米十萬石於直隸備賑○戊午以丁廷讓爲廣東

按察使

由福建鹽法道遷

○己未賞經過地方兵丁兩月錢糧○庚申賜

直隸山東江南浙江辦差官員加一級○乙丑諭軍機大臣等故
公珠爾默特策布登之子珠爾默特旺扎勒前因伊父無辜被害
賞給公爵並以伊父會鎮阿里克地方仍令鎮守今據班第參奏
珠爾默特旺扎勒爲人平常恐貽誤地方可寄信總督策楞等珠
爾默特旺扎勒但賞公爵將珠爾默特那木扎勒抄去伊父家產
查明賞還令其駐藏其阿里克地方著策楞班第等會同達賴喇
嘛公班第達及新放噶布倫等於唐古特人內揀選誠實諳練者
奏請鎮守

二月己巳朔廣江蘇安徽浙江本年歲試學額○庚午陶士儼因

病解任以顧濟美爲福建布政使明德爲福建按察使

由甘肅安西兵備道

遷○壬申免江蘇宿遷等三縣上年民欠○免兩淮鹽戶二年至十四年通賦○癸酉諭軍機大臣等據西藏糧務通判常明報軍機處文內稱阿里克地方與準噶爾接壤其原管轄之清特古斯與珠爾默特那木扎勒同日被誅所遺之缺公班第達選得集都爾前往賞給卓里克圖台吉名號等語觀班第達派人往阿里克接管事務卽賞給台吉名號是儼然以藏王自居今令以公爵管格隆事又命多立數人以分其勢彼已大失所望恐因此生心亦未可定著傳諭策楞等到藏時留心觀看料伊此時斷未必敢顯有違抗但其心稍不快足將來又恐積疑成讐外番詭譎多疑竟須明切開導以從前珠爾默特那木扎勒因有藏王稱號是以擁勢太重釀成嫌隙今之多立格隆正可保全終始令彼渙然疑釋庶可永甯亦不必豫設成見遇事猜防致伊又成一珠爾默特那

木扎勒轉於事理無益也尋奏班第達恭順可信所有集都爾台吉名號係達賴喇嘛因阿里克緊要派往之人須重其名號權宜賞給臣遵旨曉諭班第達感激涕零竭誠自矢報聞○乙亥諭軍機大臣等據班第奏公班第達告稱有拉達克汗書來稱近日準噶爾人從葉爾羌城至伊處貿易詢問達賴喇嘛班禪額爾德尼安否並及廣興黃教之事等語近日準噶爾每遣使奏懇差人進藏朕俱不允前聞準噶爾進藏道路艱難若不往迎斷不能到今觀準噶爾常差人赴拉達克貿易則彼處自有通藏之路朕雖不准其進藏而伊儻由葉爾羌城差人進藏則所關甚要將此事行知總督策楞等詢問達賴喇嘛與班第達凡準噶爾通藏道路應行防範之處詳議具奏尋奏詢稱準噶爾由葉爾羌城至阿里克地方中隔大山水草甚少難以行走每年貿易人赴拉達克皆有

定數若大眾前來拉達克汗亦不許過即使前至阿里克地方自
阿里克至藏尙有兩月路程亦不難備禦又葉爾羌城有路可通
魯都克地方亦須經戈壁行走月餘見在魯都克地方常設卡座
至冬不撤各處卡座嚴密連絡自咱拉山以外至拉卜賽那穆自
阿哈雅克以外至順圖古爾等處亦通準噶爾今請將卡座再行
展放嚴加防範仍派諳練扎薩克台吉前往巡查報聞○丙子

上奉 皇太后渡河閱天妃闌○給修築 泰陵御道占地價

除其賦○丁丑 上祭 清河神廟閱高家堰○己卯諭據刑部

將紀山由西甯拏赴前來嚴行監禁等因具奏著在京總理事務
王大臣會同該部審訊從前朕因紀山原係駐藏辦事之人令伊
前往於事有益是以多方訓飭發往紀山到藏時一切事宜並不
據實陳奏辦理轉將朕訓飭之言洩漏於珠爾默特那木扎勒且

以珠爾默特那木扎勒聽信伊言感恩奮勉等因具奏不知紀山如何向伊盟誓致珠爾默特那木扎勒如此生事此等緣由逐一研訊至紀山所稱伊駐藏時珠爾默特那木扎勒曾餽送伊銀一千兩伊若不受反恐珠爾默特那木扎勒生疑是以權宜存貯而伊回京時此項銀兩作何辦理之處並未言及俱著審明定擬具奏○壬午諭朕經過淮安見城北一帶內外皆水雖有土隄爲之防而人煙湊集之區設經異漲其何以堪甚覺怵然亟應改建石工以資保障著總河高斌等會同總督黃廷桂確勘詳估及時建築毋忽○癸未以京師米貴命附京分設四廠各發米二千石平糶○刑部奏審明革職掣問之雲南巡撫圖爾炳阿於己故永善縣知縣楊茂虧空銀米不卽參追轉令布政使宮爾勸驛鹽道郭振儀彌補應照明知侵盜錢糧故縱律擬流得旨朕以圖爾炳阿

身任巡撫兼署總督其於通省吏治全不留心整飭一任屬員恣意侵貪如宮爾勤郭振儀等司道大員侵蝕纍纍皆毫無覺察深負朕恩是以革職拏交刑部治罪其罪卽在此該部乃止就楊茂一案草率問擬以流罪完結避重就輕甚屬錯謬豈謂朕省方遠出駐蹕之次於事機偶未經意該部遂爾疏略從事耶著傳諭嚴行申飭尋奏圖爾炳阿身任封疆瞻徇欺隱於屬縣虧空不參敢代彌補且司道大員近在同城侵蝕纍纍毫無覺察應比照監守自盜錢糧銀一千兩以上律擬斬監候其侵虧銀兩俟宮爾勤郭振儀等各案審結後著追得旨圖爾炳阿依擬應斬著監候秋後處決餘依議○甲申賞加淮商引額○丙戌諭衛哲治親老不能迎養奏對之際孝意可矜朕所嘉許著仍留安徽巡撫之任廣西巡撫員缺卽著定長調補○庚寅諭朕命駕時巡周覽風俗觀民

察吏惟日兢兢我 皇祖聖祖仁皇帝巡幸東南先後六舉盛典
昭垂衡譎在耳頃者入境以來白髮黃童扶攜恐後朕已疊沛恩
膏庶敷渥澤惟念大江南北土沃人稠重以百年休養戶口益增
官茲土者其尙勵乃實心以行實政無忝教養斯民之任○辛卯
諭軍機大臣等據駐藏副都統班第奏珠爾默特那木扎勒立心
叛逆勾通準夷寄書前去私立假號種種背逆惡蹟顯露等語從
前駐藏大臣傅清拉布敦奏珠爾默特那木扎勒有猖獗之心斷
不可留請乘機擒翦朕尙意珠爾默特那木扎勒未必至於此極
令伊等詳察確實再行辦理嗣後傅清拉布敦將珠爾默特那木
扎勒誅戮朕猶以伊等雖爲國除逆要是並無籌畫草率舉事以
致捐軀今觀班第所奏則珠爾默特那木扎勒逆蹟已露實屬時
不可待而傅清拉布敦卽乘機辦理可謂奮不顧身盡忠報國者

矣前朕降旨以珠爾默特那木扎勒之子達爾扎策凌年幼令解
送來京今珠爾默特那木扎勒背逆之罪旣已顯著應照叛逆之
律辦理以爲眾戒著將班第奏摺及珠爾默特那木扎勒與準噶
爾私通書札一併寄與總督策楞等令其將朕此旨曉諭藏內之
人將珠爾默特那木扎勒之妻子卽在彼處誅戮以彰國法○諭
湖廣總督阿里衮參奏署巡撫布政使嚴瑞龍狡詐貪劣各款著
鈔寄河南巡撫鄂容安卽行馳驛前赴楚省將所參各款及摺內
有名犯證會同該督逐一秉公確查研審定擬具奏至鄂容安接
到此旨於何時起身於何時可以到楚速行奏聞以便臨期頒發
明旨又諭阿里衮參奏嚴瑞龍一摺款蹟昭彰阿里衮據實參奏
甚屬可嘉嚴瑞龍著革職看守已諭令河南巡撫鄂容安前赴楚
省會同該督秉公確審定擬具奏嚴瑞龍任所貲財照唐綬祖之

例卽行查辦不可少令其隱匿寄頓其湖北巡撫印務卽著阿里
衮暫行兼管至楚省吏治廢弛從前督撫屢經更易永興誠實有
餘初莅外任又不甚諳漢文諸務未及整頓阿里衮旣洞悉其弊
著督率屬員實心辦理務使玩愒因循觀望迎合種種陋習竭力
剔除以崇實政至德文本屬年輕未經歷練楚省臬司誠難勝任
所奏甚當已將明德調補並諭該督知之又諭湖廣總督阿里衮
參奏嚴瑞龍貪詐各款原摺並朕所降諭旨俱著鈔寄永興閱看
令其將嚴瑞龍平素居官如何所參款蹟會否聞知之處據實覆
奏尋奏嚴瑞龍久任藩司有練達名初見亦覺老成言論且以廉
隅自勵後漸覺其遇事取巧卽如參唐綏祖劣蹟面詢時指款直
陳迨令列款具稟則遲之又久稟覆後旋卽補參巧詐可見至其
貪劣各款未先覺察實屬愚闇報聞○訓明德爲湖北按察使德

舒爲福建按察使德文爲山東按察使

由湖北按察使調

○壬辰諭朕聞

常州府屬之武進陽湖二縣開抵役田租銀一項原係前明時虛

田領價後因本戶逃亡株連親族各將已產開抵實非前明原置

之田亦非當日領價之戶小民條糧役租力難並輸以致積年拖

欠朕省方所至民隱勤求清問既周倍深軫念著將武進陽湖二

縣開抵役田除應辦條漕仍照民田一例完納外其新舊租銀槩

予豁免以除民累凡爾百姓尙其永承樂利各相勉於孝弟力田

以仰副朕格外加恩之意焉○免江蘇興化縣元年至八年逋賦

○癸巳 上奉 皇太后臨幸蘇州府○準噶爾使臣額爾欽等

入貢方物○乙未賞協辦大學士梁詩正父梁文濂貂幣○丙申

賜進噶爾台吉喇嘛達爾扎敕書曰據台吉奏請差人前往西藏

喇嘛處遞贊見儀懇賜恩准等語曩者爾故台吉噶爾丹策零爲

父策妄阿喇布坦既歿奏請往藏熬茶策妄多爾濟那木扎勒爲
父噶爾丹策零既歿亦以熬茶奏請此皆欲追報先人是以俯從
所請並加恩沿途賞給牲畜路費特派大臣官員照管彼時朕卽
降旨爾台吉因有此大事朕方允行否則斷然不許所降諭旨甚
明今爾並非有如此大事何恩之當報乃欲差人往藏耶不但無
換一台吉卽遣人赴藏一次之例卽中國亦豈有屢派官兵照管
之理耶爾所請遣人赴藏之事斷不可行至所奏喇嘛學經一節
因爾舊台吉策妄多爾濟那木扎勒奏稱準噶爾地方所有西藏
喇嘛大半物故懇准少派數人至藏學經以廣黃教朕念差人至
藏學習則事不可行而爾地黃教既衰亦殊可念因爲爾等計中
國大廟內原有自藏選來高僧是以許爾處將可以學經之聰慧
喇嘛或十人或二十人送至京師習學數年而回可以闡揚黃教

此朕念和好日久周詳曲體之特恩初非敕令爾處夷人來爲僧徒也今乃謂爾處喇嘛未曾出痘不能赴京學習懇將精通經典喇嘛准請四五人到爾處教習夫學習文藝有就學無往教爾處旣稱無可赴京之喇嘛應卽行停止今爾使臣額爾欽口奏又謂台吉令伊等奏懇自藏延請四五喇嘛教習數年再令回籍等語此又與爾奏書有異朕今念爾護持黃教之意准爾所請令高等喇嘛前往教誨但旣命往之後爾毋得藉稱命往之喇嘛平常捏詞再來瀆奏是以令爾使回巢後明白宣示爾再遣使來請並將不行此等伎倆之處抒誠具奏然後令喇嘛前往此亦有關中華聲教朕豈肯令漫無德行不能訓導之人充數耶爾固不必慮此再交易一事乃朕優恤遠方之大惠前旣定以年歲約以章程卽當永遠遵照而近年貿易者貨物每次加增較前數倍邊疆司事

之臣屢請駁回朕念其攜貨遠來若不准銷售則虧損實多姑准量爲交易而該使該商皆謂不知從前議定成數又謂非能自作主張歸當告知台吉伊等果歸告與否固未可知然恃朕遷就加恩因而屢增無厭將來必至定數之外一一駁令帶回而後已今特明切曉諭嗣後肅州貿易毋得過乾隆十三年貨物之數使臣前來以尼瑪上次帶來貨物爲準如逾此數卽由邊境駁回不准貿易爾其曉諭使臣商人等俾知敬謹遵行朕亦敕諭疆吏照此辦理今後不得仍以不知成例爲辭也

三月戊戌朔 上奉 皇太后臨幸杭州府○以廣東原任侍講劉起振年踰百齡赴浙迎 駕特賜詩章扁額○頒江甯蘇州浙江各書院殿本經史○貸黑龍江呼蘭地方水災旗民免官莊莊丁本年額賦○己亥諭安徽巡撫衛哲治見在丁憂其員缺著張

師載以原品級管安徽巡撫事速赴新任安慶與南河相距不甚遠至秋伏大汛時張師載仍應赴南河協同總河高斌學習防護事宜其巡撫印務卽著墮帶亦不至於地方有誤○庚子 上幸敷文書院○幸觀潮樓閱兵○壬寅諭朕向觀嚴瑞龍爲人每事有心取巧是以未經升用去冬因其參奏唐綬祖貪婪各款不避嫌怨是能改其故習是以降旨褒嘉令其署理楚撫今據該督阿里袞列款參奏不但取巧且有賊私則知其參劾唐綬祖亦因承興交查自知平素迎合必將敗露乘此先發仍不出取巧故習嚴瑞龍著革職令河南巡撫鄂容安前赴楚省會同該督阿里袞確審定擬具奏嚴瑞龍能據實揭參自爲用所當用今劣蹟昭著自必罪所當罪惟其自取無容心焉朕之用人行政大公至正不設成見而罰在必行如此著傳諭中外知之阿里袞摺並發○諭據

河南巡撫鄂容安參奏稱歸德府紳衿中有倚勢抗糧惡習彭家屏李肖筠兩姓卽欠至七千餘兩之多而彭家屏之弟彭家植致死佃戶諱匿不報李肖筠之父窩藏逃犯玩法抗拘等語彭家屏李肖筠皆司道大員深受國恩理應奉法急公型家表俗以爲紳士之倡乃逋負正供多至七千餘兩今春特恩寬免豫省積欠本以蘇窮黎下戶之困苦將官戶久抗之糧一體豁免不特伊等視爲得計使小民效尤人思僥倖大爲人心風俗之蠹不加重懲無以示儆彭家屏李肖筠著交部嚴加議處所欠積年正供之數加罰十倍該撫勒限嚴追其彭家植李熹應審之案仍著該撫嚴審定擬具奏○諭浙江布政使員缺著葉存仁補授按察使員缺著德福補授所遺杭嘉湖道員缺著山東按察使德文補授其山東按察使員缺著和其衷補授○癸卯祭錢塘江 上奉 皇太后

渡江○御史范廷楷奏四川民陳昌妻趙氏因夫死絕嗣遂謀殺夫弟之子元書元格嚇逼元書未成婚養媳劉氏執鐙同往手刃元書將殺元格劉氏息鐙扯止部議將趙氏照謀殺卑幼律擬絞監候援赦寬免劉氏照謀夫律凌遲處死趙氏因已無子遂欲並殺叔子以絕先嗣準情比律明犯十惡不赦之條且劉氏童年無知趙氏陷以極刑若將首惡趙氏援免劉氏凌遲處死殊未平允得旨御史范廷楷摺奏四川趙氏謀殺夫弟之子陳元書一案其所援引議論雖覺支繞但其案情若果如所奏則刑部定擬實屬拘例而不順情外謬之極矣著刑部堂官明白回奏尋奏趙氏係期親尊屬故殺卑幼並非十惡與援赦例相符劉氏年已十六非無知識雖非造意實屬同行況欲殺夫弟則知息鐙扯止致死伊夫則竟持鐙立視情難曲宥刑部執法定案不敢移律就情雖該

督聲明情節仍不夾籤得旨趙氏謀殺夫弟之子元書一案刑部
明白回奏之處展轉辭費終歸迴護究不出於前旨拘例而不順
情之語既有尚未成婚情節卽當據此聲明夾籤矣此案御史范
廷楷所奏爲是初不因御史先入之言稍有成見也劉氏童年愚
稚尙未成婚遽處以極刑情殊可憫然部中指其知救夫弟而不
救夫則朕亦不能法外貸其死矣著改爲立斬趙氏情實慘毒著
依本律不准援免○甲辰裁杭州漢軍副都統一○乙巳祭禹
陵○丙午上奉皇太后還駐杭州府○諭各省督撫本年恭
逢皇太后六旬聖壽祝嘏外毋許進獻○丁未閱兵○予禹
陵奉祀妣氏子姓八品世職官○戊申諭前因高斌足疾不能行
走是以解退大學士之職令其辦理南河事務任事以來甚屬黽
勉宣力茲由江省扈從來浙其屬員無不奮勉足見高斌董率有

方深爲可嘉著仍以大學士銜管河道總督事以示優獎○賜浙江召試諸生謝墉等三人舉人授內閣中書○庚戌 上奉 皇太后自杭州回鑾○諭前因浙江士庶誼切急公正供槩無宿逋頒諭嘉獎誕布特恩頃周覽土風閭閻趨尙較吳稍樸但浮競之習舉所不免其蓋藏之未裕均也封疆大吏暨監司守令當以移風易俗爲己任其在小民則宜崇實去奢雍睦敦讓相勉於孝弟力田將見化行俗美進而日上其善承朕意毋怠○東閣大學士張允隨卒予祭葬諡文和○辛亥命附京四廠各加撥倉米四千石平糶○癸丑 上奉 皇太后駐蹕蘇州府○乙卯 幸宋臣范仲淹祠賜園名曰高義賞後裔范宏興等貂幣○己未以夢麟爲內閣學士由祭酒遷○庚申命致仕侍郎沈德潛在籍食俸○辛酉 上奉 皇太后臨幸江甯府○壬戌祭 明太祖陵 御書扁

額禁樵採○上奉 皇太后臨視織造機房○閱兵○乙丑諭
紀山前歲駐藏怯懦無能事事順從珠爾默特那木扎勒任其恣
意妄行與之盟誓以致逆謀益肆此番西藏之事紀山實爲罪首
是以拏交刑部治罪業照部議應斬監候秋後處決尙不意其悖
謬妄亂更有出於情理之外者今據策楞兆惠班第納穆扎爾等
奏稱紀山此番駐藏令兵丁演戲班名自樂時與珠爾默特那木
扎勒宴會觀劇日在醉鄉並送珠爾默特那木扎勒八轎仍派轎
夫前往教演番奴擡轎以肆其志等語伊在藏如此行爲及傅清
拉布敦至藏乃以體制裁正珠爾默特那木扎勒遂成嫌隙設令
紀山早能持正珠爾默特那木扎勒亦必自知斂戢是傅清拉布
敦之死皆紀山之喪心無恥曲意逢迎有以致之也紀山之心蓋
希冀苟且度日過此二年得代回京而於國家大體藏地安危一

切置之度外大臣如此存心尚可問乎尚可倚任乎此案策楞等四人合奏證據明確實可髮指紀山之父陣亡賜卹朕所深知紀山卽犯賊私重辟朕必原情曲宥至關繫軍國重務朕不容屈法豈陣亡後裔遂可偷生附叛乎紀山本應卽肆市曹仍念其先代陣亡姑從寬賜其自盡著在京總理王大臣傳諭刑部尙書阿克敦內大臣嵩壽齋旨前往監看並示中外知之○策楞等奏酌定西藏善後章程一西藏辦事格隆向例四人格隆布隆簪失明被珠爾默特那木扎勒革退見在班第達策楞旺扎勒色裕特塞布騰三人班第達奉特旨以公爵辦格隆事策楞旺扎勒色裕特塞布騰查無黨逆情形且係奉旨原放格隆並賞布扎薩克頭等台吉職銜應仍留辦格隆事布隆簪缺選放深於黃教喇嘛一人賞給扎隆大喇嘛名色一格隆會辦事件舊於噶沙公所會辦自願

羅爾後各格隆俱辦事私宅舍官放之員不用添用私人嗣後應
仍赴公所會辦私放之員裁革一各處喋巴等官有管理地方教
養百姓之責珠爾默特那木扎勒各放私人其人又不親往差家
奴赴辦擾害地方嗣後格隆等應公同稟報達賴喇嘛並駐藏大
臣補放家奴代辦者撤回人地不相宜者換補至各寺堪布喇嘛
並照舊由達賴喇嘛派選一卓呢爾商卓特爾會本隨本各官名
色惟達賴喇嘛前有頗羅爾封王後亦照添設應查革止於公所
設立卓呢爾二人兼領原設之仲意筆七格等辦公一格隆向止
辦地方事兵馬卡隘俱責成代奔後藏地小且設代奔三人衛地
大僅代奔一人遇差假無人彈壓地方護衛達賴喇嘛應添設一
員與見有代奔於補放時一體頒敕一全藏人民向屬達賴喇嘛
按地方大小人戶多寡均定差徭頗羅爾等任意侵占或市私濫

賞甚至擅給免差文書於所憎則加派嗣後格隆代奔等應公查
舊檔除因公勸賞毋庸撤回外私賞濫免者並查稟達賴喇嘛撤
繳加派者減一達賴喇嘛差務向由地方百姓供應自頗羅鼐等
任事後凡格隆代奔等差人往西甯打箭爐色爾喀馬阿里克等
處交易亦私出牌票致烏拉派累百姓嗣後應禁止遇公事稟明
達賴喇嘛發給印票遵行一達賴喇嘛倉庫向係倉諸巴專管公
事動用格隆等稟明達賴喇嘛代理啓閉俱以達賴喇嘛印封爲
憑頗羅鼐等始行擅取嗣後應仍照舊辦理一哈拉烏蘇接壤青
海阿里克接壤準噶爾應令達賴喇嘛選員駐紮並咨部奏給號
紙一達木蒙古前經頗羅鼐奏由該王差遣珠爾默特那木扎勒
被誅後潛回達木查該蒙古等皆無罪之人旣願歸達木候差自
宜妥爲安頓其見有頭目八人名號或稱宰桑或稱台吉均係頗

羅鼎等妄加應改爲固山達所屬擇授佐領驍騎校各八人給頂
帶歸駐藏大臣統轄仍令每佐領各派十人駐藏備差至向駐藏
地餬口之蒙古數十戶查明存案准其留藏得旨著照所定行下
部知之諭軍機大臣等策楞等所奏辦理藏地事宜朕已批照所
奏允行但藏地關繫最要者尤在臺站此乃往來樞紐所在觀從
前珠爾默特那木扎勒不令塘站遞送文書卽至驛遞斷絕及班
第達傳令遞送始復通行皆由伊等主持而駐藏大臣不能制其
行止操縱何以得其要領此處最宜留心辦理朕前亦諄諄降旨
何以策楞等此奏內於此條反致未經議及但此時甫經定議又
因此條有所更張反致藏中諸人啓疑止可令班第納穆扎爾留
心俟一二年後再辦理請旨可也又見議內補放喋巴等官有管
理地方教養百姓之責以後補放其權皆歸達賴喇嘛駐藏大臣

等語此種喋巴頭目所管何事何處地方其裏塘巴塘一帶塘站
是否亦係此等頭目所管若卽係此等頭目所管則權已歸達賴
喇嘛駐藏大臣不致復有塘站阻隔之事此旨所問卽不必辦理
再兆惠由京中特遣前往原爲辦理藏地一切機宜自應俟諸事
奏定准行接旨後奏聞卽日回京方是乃甫經立議不待批覽一
面具摺一面奏明起程且有欲速之意若云彼處情形則早已悉
知不待兆惠面奏始知京中有何事迫不及待若此耶去時星速
是爲志切急公來復遄行則心存內顧耳著傳旨申飭○丙寅祭
江神 上奉 皇太后渡江○丁卯諭大學士張允隨病故員
缺一時未得相宜補授之人原任大學士陳世倌從前罷任尙無
大咎上年已復予原銜此番於行在屢經召見雖年過七十精力
尙健且係舊人仍著入閣辦事○賜江南召試諸生蔣雍等五人

舉人並進士孫夢達同爲內閣中書

夏四月戊辰朔停本年會試五經中額○癸酉 上閱蔣家壩○

免江南沛縣九年以前逋賦○甲戌祭 河神 上率 皇太后

渡河○丁丑諭洪澤湖上承清淮汝潁諸水匯爲巨浸所恃以保

障者惟高堰一隄天然壩乃其尾閭伏秋盛漲輒開此壩洩之而

下游諸州縣胥被其患冬月清水勢弱不能刷黃往往濁流倒灌

在下游居民深以開壩爲懼而河臣轉藉爲防險祕鑰二者恆相

持朕南巡親臨高堰循隄而南越三滾壩至蔣家閘周覽形勢乃

知天然壩斷不可開夫設隄以衛民也隄設而民仍被其災設之

何用若第爲掣流緩漲自保上游搶險各工而鄰國爲墾田廬淹

沒弗復顧惜此豈國家建立石隄保護生靈本意耶爲河臣者固

不當如此存心也天然壩當立石永禁開放以杜絕妄見近者河

督大學士高斌副總河巡撫張師載於開天然壩之說亦深以爲
非而請於三滾壩外增建石滾壩以資宣洩朕親臨閱視謂增三
爲五卽以過水一二尺言之向過三尺者卽爲五尺向過六尺者
增而至丈是與天然壩名異實同人必有議其巧避開壩之名而
陰襲其用者是當爲之限制上年滾壩過水三尺五寸天然壩仍
未開放應卽以是爲準俾五壩石面高下維均以仁義禮智信爲
之次仁義禮三壩一如其舊智信二壩則於石面之上加封浮土
必仁義禮三壩已過水三尺五寸猶不足以減盛漲則啓智壩之
土仍不減乃次及於信斯爲節宣有度較之開天然壩之一往莫
禦者懸殊矣再高堰石隄至南滾壩以南舊用土工石隄有首無
尾形勢不稱應自新建信壩北雁翅以北一律改建石工南雁翅
以南至蔣家閘水勢益平則石基顛蓋如此方首尾完固屹如金

湯永爲淮揚利賴至洪湖束水藉以刷黃而上游宿虹鳳潁諸邑
歲被水患議者謂洪湖盛漲諸邑先被其災洩洪湖仍於上游無
補自朕觀之漲減則上游之漫溢者亦減此固在封疆大吏於未
被水時先事綢繆而司水土者亦未可以閤閭休戚非己職掌所
在而專以束水保隄爲得計也河工宿弊不可枚舉而無益之費
尤多或明知無用而因循不廢或陰以爲利而妄事興修高斌張
師載於此雖能持正如茆家圩頭二草壩固已廢所當廢而此外
無益之費卽以朕巡視高堰一壩之內已不勝屈指數然屬員已
議其不發帑不興工矣朕觀河臣筦領河漕數千里民命所繫視
督撫綏輯一二省者爲難冒涉風雨守護隄防亦視督撫坐辦案
牘者爲勞而督撫職在刑名錢穀事有實據是非難掩河臣遵守
章程可以福命苟安無事則其任較易厯來河臣不乏表表尸祝

之輩而糜帑養患有罪無功其識機宜得關鍵實著功效者幾人哉果使全不興工則置民瘼於不問河臣幾於虛設固無此政體如其糜脂膏以擲虛牝則蠹弊之最巨者總之河不可不治而毋循其虛名工不可不興而必歸於實用斯爲至要昔我皇祖聖祖仁皇帝屢幸南河躬親指示平成睿略萬世永賴朕何能仰企一二卽經臨視有所籌畫亦不敢自信爲必不可易惟愛養黎元揆理度務崇實敦本兢兢業業之衷可共白耳將此詳悉宣諭中外臣民其庀材興工一切應行事宜河臣會同督臣按例確估具題○己卯以恆文爲湖北巡撫由直隸布政使遷○庚辰吏部議准兩廣總督陳大受等奏廣東通省向止設學政一員嗣因士習器陵雍正七年添設肇高學政今士子仰沐教澤各知安分請照舊統設一員從之○辛巳諭前駐藏都統傅清左都御史拉布敦因珠爾

默特那木扎勒逆謀顯著先事剪除奮不顧身忠誠卓越俱已加
恩贈卹入賢良祠昭忠祠祀典傳清並入伊家祠從祀不知者或
訾二人冒險邀功且議朕爲酬庸過厚也今據駐藏班第策楞等
奏珠爾默特那木扎勒自立名號潛遣其心腹堅參扎錫等通款
準噶爾稱策旺多爾濟那木扎勒爲汗且求其發兵至拉達克地
方以爲聲援幸值準夷內潰所遣使人回藏被獲得其逆書並餽
獻諸物是其陰蓄異志句結準夷罪不容誅設非二臣協力同心
決計先發則其貽害藏地將不可言是二臣之心甚苦而有功於
國家甚大應特建雙忠祠合祀二人春秋致祭丕昭勸忠令典傳
清既有專祠著不必從祀家廟該部會同內務府查撥官房營度
以聞尋立祠崇文門內○乙酉諭據阿里衮鄂容安參奏永興進
京途次聞訃嚴瑞龍私派各府州縣幫助盤費代雇騾頭又公揆

銀兩送京交永興收受及提用道庫養廉並未扣還歸補各款永興由滿洲世臣久列近侍優加擢用畀以總督重任乃不能潔己率屬劣蹟纍纍其提用庫項並不奏明固屬不合尙係向來所有至收受派幫銀兩則貪污卑鄙深負朕恩著革職拏交刑部俟嚴瑞龍案審明到日將永興一併治罪○丙戌 上駐蹕泰安府祀東嶽○戊子諭日食天變之大者自古重之顧僅以引咎求言虛文從事夫豈應天以實之義乃者五月丁酉朔日有食之朕自惟宵旰憂勤無時不深乾惕甯待懸象著明始知戒儆然遇災而懼罔敢不欽戒慎修省惟崇實政行在鑒儀衛早晚鼓角是日著停止一日以示撤懸齋戒我君臣當就常存之敬畏倍加謹凜益修實政卽如朕省方所至戲臺綵棚龍舟鎗舫俱可不必朕向來巡幸地方官惟修治道途此外一無華飾自乾隆十三年東巡該

撫等於省會城市稍從觀美後乃踵事增華雖謂巷舞衢歌輿情共樂而以旬日經營僅供途次一覽實覺過於勞費且耳目之娛徒增喧聒朕心深所不取第先期業經豫備今歲恭遇 皇太后萬壽兆庶亦藉以申祝嘏之忱是以俯順民情至朕待督撫有司惟因其能實心辦事令地方日有起色方加恩獎予而不知朕心者未必不以辦差華美求工取悅爲得計將玩視民瘼專務浮華此風一開於吏治民風所關者甚大嗣後尋常行幸槩不准行違者以違制論並諭中外知之○命立傳情拉布敦祠於藏地通司岡○辛卯諭向來分發各省人員由吏部堂官揀選引見雖該部職掌所在然未足以示慎重嗣後除特旨交該部於次日卽行引見者仍由該堂官揀選外其餘凡有揀選之處著將滿漢大學士九卿並該部堂官一同開列候旨特派大臣揀選交該部帶領引

見著爲例○予致仕尙書魏廷珍之子魏錫齡一品廕生○癸巳諭據在京總理事務王大臣審訊永興家人楊三供稱本年二月內有嚴瑞龍會姓家人同在京買賣人紀姓送來銀一千兩原爲幫助喪事永興因喪事已畢並未收受令伊帶回等語會姓既係嚴瑞龍家人著傳諭阿里袞鄂容安就近將所送銀兩永興果否未經收受之處訊取確供速行奏聞尋奏訊據嚴瑞龍家人供上年十二月嚴瑞龍差伊齋銀一千兩送與永興投書後未經傳見將銀寄京而回今年二月復差伊將前銀再送卽抵司道公幫之數仍未收受止作書回謝遂將銀六百兩分別寄當在京攜銀四百回楚詰問嚴瑞龍供認送銀是實臣等將訊取會升並嚴瑞龍各供及永興回書四件前已會摺陳奏報聞○以陳世倌仍爲文淵閣大學士兼工部尙書○改築直隸永定河冰窖草壩河

五月丁酉朔日有食之○策楞等奏前酌議西藏一切章程奉旨
允行惟未將設立臺站並喋巴等官所管事務地方詳議蒙旨指
問查打箭爐至裏塘巴塘均內地所轄巴塘所屬蟒里以西至江
卡爾所屬石板溝皆西藏所轄江卡爾設有喋巴管理石板溝以
西至巴賈係乍了地方巴賈以西至恩達係察木多地方恩達以
西至嘉玉橋係類烏齊地方均各有呼圖克圖管理受內地節制
調遣不歸西藏統轄自嘉玉橋抵西藏共一千九百六十餘里均
係藏屬地方大小各設喋巴一二名不等管理地方人民一切事
務與內地州縣同設臺站共二十五塘三汛臺站官兵所需各項
俱由各喋巴辦應番地之操縱權在喋巴喋巴去取議歸達賴喇
嘛駐藏大臣主持臺站一切毋庸更辦故未專款另議然未聲明
情節實屬疏忽得旨非疏忽而何○己亥改建浙江山陰縣石塘

○以范時綬爲湖北按察使

由河南糧
驛道遷

○庚子

上奉

皇太后

還京師○命再撥京倉米十萬石於四鄉平糶○辛丑加賞八旗

兵丁甲米一季○丁未

上臨奠駐藏大臣原任都統傅清左都

御史拉布敦○戊申諭阿里衮鄂容安查審唐綬祖原參各款審

無得贓分肥情事惟任聽爐頭私買銅鉛添鑄寶屬違例故縱議

以革職嚴瑞龍餘罪皆輕惟輕出重入一款入己贓至四千八百

兩議以斬監候若論按律問擬亦止可如此歸結而殊未得此案

辦理之正法也蓋永興嚴瑞龍等參奏唐綬祖摺內有婪索邱鑑

賊銀數至鉅萬一款情罪最爲重大乃係此案關鍵朕以唐綬祖

身爲巡撫如果婪取屬實即使立行正法亦所應得今閱唐綬祖

供詞既稱毫無影響而嚴瑞龍亦供係唐綬祖授意陶士傑向邱

鑑派捐夫派捐與婪取大相徑庭是嚴瑞龍已與原參矛盾使初

參時本無此種貪縱重情朕亦豈有卽將唐綬祖革職拏問並查封家產之理今旣審無實據則嚴瑞龍之愆憑永興架詞誣捏永興之輕信嚴瑞龍率入彈章之處按律自應分別反坐總因唐綬祖生平居心巧詐器量不能容人嚴瑞龍意恐爲其所制而適值永興之易被其愚是以多方聳動成此大案至唐綬祖多支養廉之處更無足深罪卽嚴瑞龍侵用餘平一項亦係各省藩司相沿陋習况伊在任多年所積數止於此是其操持尙知謹慎以此定其罪案反使彼得以有辭卽永興於送京銀兩旣查明未經收受其於家眷回京收受司道銀兩在永興係內廷行走之人固不應有此然因喪事而贖賻外省亦所不免朕惟懲狼藉亦慮魚無著該部將旨內情節分別定擬永興嚴瑞龍罪狀奏聞唐綬祖婪索屬虛失察之罪本輕所有原封家產著查明給還來京候旨酌量

加恩錄用朕辦理庶務一秉大公。有罪者法在必行。無罪者自當昭雪。從無絲毫成見於其閒也。將此曉諭中外知之。○辛亥賜吳鴻等二百四十三人進士及第。出身有差。○乙卯 皇十子生。○撥福建江南倉米於浙江温州台州二府平糶。○戊午諭據尙書舒赫德會同總督方觀承查審參革永定河道英廉等捏飾誤公一案。英廉身任河道隄工。乃其專責。遇有衝決。實已無所辭咎。但其初報月隄漫口。而諱言大隄衝刷。或係希冀潛行堵修。以圖完局。該督旣據稟明。卽應一面詳查。一面具奏。乃方觀承上年五月初二日奏摺內止稱一應工程平穩。並不將月隄漫口之處據稟入告。亦未必不思以無事爲福。是以英廉得展轉翻變。日久延挨。朕彼時早鑒及於此。卽以報災不可存粉飾之意。批示方觀承亦應服朕之洞燭隱情。自知引咎矣。至摺內稱英廉未將淤溝先事

豫防以致大溜直注此語殊未足以服英廉之心伊到任未及兩月淤溝卽有疏忽亦係僧保任內之事未可以此爲英廉罪案朕辦事一秉虛公旣確見情形如此不可不明白宣示然以督臣劾一道員自參自審何難任意輕重竟行入罪定案乃懸案經年未敢迴護已見違爲審結俟特遣大臣前往會同查辦是其心尙知所做畏亦朕辦理庶政務求至當不容稍存含混之明驗也英廉等已經革職所有廢費工程銀兩自應照例分賠還項原摺著交部議奏並將此旨詳悉曉諭中外知之○己未諭軍機大臣等山西巡撫阿思哈續參朱一蜚護理撫篆時收受護太原府事之太谷縣知縣馮浩人贖三斤將馮浩保升保德州知州等語朱一蜚屢任藩司先經該撫參奏求索部民勒派屬吏縱容親戚家人庫官吏役婪索分肥劣蹟累累深負擢用之恩已降旨革職審擬

其應賠庫項甚多著傳諭浙江巡撫永貴將伊原籍家產貲財迅速查明具奏無令稍有隱匿寄頓以備賠項○刑部議覆湖廣總督阿里衮等奏嚴瑞龍身任藩司種種不法誣捏唐綬祖焚賊鉅萬愚弄永興懲慝參奏應將嚴瑞龍比照誣告人死罪已決律擬斬監候秋後處決其應追銀兩均照追入官永興輕信嚴瑞龍將唐綬祖率入彈章應照嚴瑞龍死罪減一等杖一百流三千里係旗人折枷六十日鞭一百不准納贖其提用道庫及各屬幫貼盤費雇騾價銀共六千四百七十兩零應令該旗著追至原任同知王雲翔合依監臨官吏借貸所部財物計贓準不枉法論律應杖一百流三千里但查其母老丁單已於上年十月告請終養應准存留養親得旨嚴瑞龍依擬應斬著監候秋後處決永興枷號鞭責之處著准其納贖王雲翔原擬杖流亦著令納贖准其存留養

親餘依議○庚申命總管內務府大臣輪年修理紫禁城內地方
著爲令○壬戌諭向例直省知縣三年行取一次吏部按期奏請
康熙雍正年間少舉多停當朕臨御之初臣工中有援行取成規
入告者朕以舊制可循敕部議覆旋經准行由今觀之此特相仍
故套而於吏治人才毫無裨益所當永行停止蓋此制始於前明
其時專重資格按俸遷轉不得不以部用一途疏通壅滯而亦銓
部漁利之一途也今則直省州縣定缺升調其途甚廣凡有才能
傑出之員督撫無不保題擢用常有要缺懸待一時不得合例之
人而越格奏請者在此時之州縣實無壅滯之歎督撫於地方能
員亦無不欲其駕輕就熟收臂指之助遇有隔省升調往往爲之
懇切奏留未肯令其遽離原任且繁劇之任參罰必多凡謂無事
故合行取之例者大率庸流居中簡之缺尋常供職倖免處分者

耳卽以銓補部曹多屬迂疏潦倒了無出色在該部又無出力之處況縣令身膺民社百里之寄任旣匪輕才亦可展使其果屬賢員方議令久於其任以責成效而部曹分局一司遇事簡之缺無所表見長才處此轉覺用違其材若謂司員當由邑令升用深知民生利弊於部務有益此又不然部務責成自有尙書侍郎夫尙書侍郎亦惟視其才識勝任否耳何必曾任邑令方知民生利病豈非所謂學養子而後嫁者耶若必待行取之人數歷多年方授以綜理部務之任此尤事勢所難行試觀我朝九卿無論滿員卽漢大臣中多有翰苑升用者起家縣令者幾何人外而督撫起家縣令者又幾何人可指數而知其爲拘墟之論矣此實向來沿襲具文揆之當今之務亟須改弦毋庸守轍所有直省知縣三年行取一次之處著永行停止至科道近列臺垣優絀尤爲易見自可

不時擢用而定例內升外轉給事中則一年一次御史則一年兩次每年徒增此提奏繁文於治理亦復無益嗣後內升外轉著三年舉行一次著爲例朕辦理庶政因時制宜不設成見於激清吏治鼓勵人材之道洞燭原委一切應行應止務求實效屏斥虛文大小臣工其咸悉朕意舉以實心行實政自無不集之事將此詳諭中外知之

閏五月戊辰大學士等議覆兩淮鹽政吉慶等奏兩淮行運江廣引鹽價賤虧商貴則病民近定議貴賤兩價照年之豐歉請自辛未綱始酌定奏辦其丁卯戊辰己巳三綱槩賣之貴價並免追繳以恤商力等語查該處並未報災而造報引鹽任聽該商昂貴未便免追所有丁卯戊辰楚鹽多賣銀九十六萬餘兩己巳綱西鹽多賣銀十六萬兩應追報部諭兩淮運銷丁卯戊辰己巳三綱引

鹽皆照貴價曾經部駁追繳今該鹽政吉慶等又復奏請免追該部仍照例議駁此雖部例但向來各省鹽引原聽其自相交易無官爲限制之例長蘆河東至今尙然惟兩淮行運江楚鹽引適因崔紀沾名三保庇商兩持異議始將各商運楚成本分別定以賤價貴價然自定價以來商人總以貴價銷售至今夫恤民裕商本屬一事若任其屢擡時價日引月增則於民食有關然勒令賤賣則該商等又以成本有虧不免紛紛籲請今計各商比年行銷價值於成本自可無虧將來卽藉口年歲不齊料亦不過如今之所稱歉年而止耳嗣後准商銷售引鹽卽遇應貴之年亦不得於見在所銷價值外復議稍有加增庶可示以限制至於歲事豐稔鹽價可以酌量平減則令各該督撫會同鹽政等隨時籌畫妥辦部臣亦不必固執定例徒滋駁詰之繁庶於商民均爲有益至部議

已賈貴價令商人追繳之處事理亦屬難行若云賈貴在民則應
仍給還食鹽之戶於勢固有所不能否則以商人市價所餘而歸
之官帑於政體尤有所不可總之民間物價本自不齊止可隨時
調劑不能槩繩以官法卽如人生日用最急者莫如食米一項今
謂意在恤民而欲官爲立制務使市價損之又損閭閻皆得賤食
意則美矣欲其行之於事能乎不能乎國家休養生息百有餘年
戶口繁衍自古希逢之盛會人庶則用廣用廣則價昂此一定之
理經國者要在務持大體而於事勢通變贏縮之間爲之補偏救
敝俾庶政皆得其平卽所以嘉惠元元者不外是矣因議鹽法故
推類及之而因時立制之道實亦不外此將此詳論中外知之○
己已諭軍機大臣等我朝統一寰宇凡屬內外苗夷莫不輸誠向
化其衣冠狀貌各有不同今雖有數處圖像尙未齊全著將見有

圖式數張交近邊各督撫令其將所屬苗獠黎獍以及外夷番眾俱照此式揀倣其形貌衣飾繪圖送軍機處彙齊呈覽朕以幅員既廣遐荒率服俱在覆含之內其各式圖據自應存備以昭王會之盛各該督撫等或於接壤之處俟其順便往來之時或有人前往公幹但須就便圖寫不得特派專員稍有聲張以致或生疑畏俟伊等奏事之便傳諭知之○裁山西雲南浙江布政司庫副使○辛未諭御史孫宗溥奏請酌定經制以節民用一摺欲將民間婚喪宴享酌立規條於教化之中寓制防之限似亦黜浮崇實之意但天下之大五方風氣不齊唐魏之勤儉吳會之華靡自古已然皆各隨其土性以成習尙是以山陝之民富者知節嗇江浙之民貧者矜華靡其風自難頓革是惟力爲漸摩去其太甚以漸至於返樸還淳耳且地方有富民遇貢祭等事卽用度較豐小民亦

得資其餘憑以事生養必令吳越之俗迫之使效秦晉之風無論一時難強且使富者專利自封則貧者益難餬口矣若槩恐其時絀舉羸遂嚴立限制抑而裁之以示必從不從卽以法繩其後此勢之所不能徒使胥吏乘此需索訛詐更爲民累卽特頒禁令亦不過託之文告一經曉諭便可置之不問於閭閻有何裨益在孫宗溥自謂但去其太甚無事煩苛滋擾亦明知其事之難行矣如果華侈太甚地方有司自應隨時教導使之潛移默化若惟是撙拾浮詞而爲此奏則仍以虛文相尙朕所不取著傳諭中外知之○諭正藍旗議奏桂林府知府張永燾名下應追分賠原任臨桂縣知縣徐上達虧空那移銀兩見無家產請交廣撫於分賠各員名下再爲攤賠一摺向來屬員虧空本人力不能完責令上司分賠歸項所以懲失察而儆官邪原係從前舊有之例朕御極之初

於虧空案內分賠各項多從寬宥地方官不能體朕格外加恩之意因循故智近年來轉有簞簞不飭竟將國家帑項婪歸私橐者此等貪黷之風不可不力爲整頓是以按照定律懲一儆百期於辟以止辟乃臣工等又不免意涉揣摩遂將屬員虧空之項槩議上司分賠於政體未爲允協蓋上官有察覈屬員之責地方官實係侵帑自肥及因事婪贓者上司平時漫無覺察自當按數分賠以昭懲創至於那移糜爛之款旣非侵貪重案可比亦尋常牧令所不能免之事將該員律擬覈追已足以示懲儆若槩令上司分派賠補揆之情理殊失其平非禁戢貪婪之本意且此等案件經部臣行令分賠之後仍不免遷延日久終以產絕無追具結請豁是又有名無實徒增案牘之煩耳於事何益嗣後凡虧空案件到部應詳加察覈其有實在侵貪入己之劣員仍令該上司等分賠

不得稍爲寬貸其他如那移款項與倉穀浥變等事止將該員議
罪著追不必槩令上司分攤賠補致滋擾累朕經理庶務應寬應
嚴惟準乎情理之正從無畸輕畸重之見存乎其間也將此詳諭
中外知之此案著免其行令攤賠○癸酉撥呼蘭倉米一萬石於
船廠平糶○甲戌諭庶常分習清書例由翰林院掌院學士分派
惟量其年力不拘省分舊時清漢各半自雍正年間以來分習清
書者漸少每科尙有十四五員十七八員不等朕思邊省之人館
選本少聲律亦素所未嫻旣習國書自必專意殫精惟清文是務
非天分優而學業勤者不能兼顧漢文益致日就荒落迨散館時
或以清書優等授職而留館後遇通行考試往往絀於詩賦列入
下等改令別用究其所肄清文自散館一試外別無職分應用之
處微獨邊省卽北五省庶吉士類然翰苑中江浙人員較多而遠

省或致竟無一人者非所以均教育而廣儲才也嗣後雲南貴州四川廣東廣西等省庶吉士不必令習清書直隸山東河南山西陝西等省亦視其人數若在三四員以上酌派年力少壯者一二入其江浙等省人數在五六員以上者酌派二三人率以三十歲以下者充之每科通計在十人內外甯缺無溢循舉舊章備國朝典制足矣該衙門卽遵諭行○戊寅諭陝甘自尹繼善赴川懸缺已久黃廷桂著調補陝甘總督著卽速赴新任尹繼善著調補兩江總督俟策楞回川之日來京陛見再赴江省尹繼善未到之前兩江總督卽務著高斌暫行兼管○諭軍機大臣等黃廷桂調補陝甘總督已降諭旨伊在兩江總督之任兩載有餘朕詳加體察伊於江省不甚相宜蓋南人風氣柔弱而黃廷桂性情剛躁幾於水火之不相入此番辦差諸事該省吏民畏愼之心勝而悅服之

意少黃廷桂喜怒之閒亦不得領要受其呵斥者固不能無怨卽
爲獎許者亦不以爲感久之將何以行其威令必令久於江省未
免用違其長且如王師張師載二人在黃廷桂面對時何嘗不奏
稱王師等尙肯實心相助而王師等在朕前頗露畏懼該督之意
督撫共事一方設令外合中睽地方亦屬無益陝甘民情本屬陽
剛於黃廷桂性情爲宜伊前任甘肅巡撫深爲稱職是以調任陝
甘但伊待下褊急往往聲色俱厲亦屬過當朕旣體察及此故明
切訓諭令其知改人之性情固不能無偏但當自知所短留心檢
點以平正率屬方能諸事合宜將來莅陝甘後亦不可一往任性
失中正之道也陝甘自尹繼善赴川至今懸缺已久黃廷桂不必
來京請訓朕面訓亦不過此謹識而力行之惟該督是望○撥山
東山西河南耗羨銀二十五萬兩於直隸修理城工○庚辰准各

省駐防將軍副都統子弟隨任○辛巳諭朕前降旨令九卿督撫薦舉潛心經學之士雖據大學士等覈覆調取來京候試見在到部者尙屬寥寥但觀此番內外諸臣保舉尙未能深悉朕意蓋經術爲根柢之學原非徒以涉獵記誦爲能朕所望於此選者務得經明行修淹洽醇正之士非徒占其工射策廣記問文藻詞章充翰林才華之選而已亦非欲授以政事實其當官之效如從前各保一人故事此朕下詔本意也在湛深經術之儒原不必拘拘考試如若內外所舉既有四十餘人卽云經術圓明安得如許積學未遇之宿儒其閒流品自不無溷淆豈可使國家求賢之盛典轉開倖進之捷徑勢不得不慎重考校以甄別之聞有素負通經之譽恐一經就試偶遇僻題必致重損夙望因而託詞不赴以藏拙爲完名者苟如此用心已不可爲醇儒矣其安所取之然此中亦

實有年齒衰邁不能跋涉赴考者伏生年九十餘使女孫口授遺經於鼂錯其年豈非篤老何害其爲通儒此所舉內果有篤學碩彥爲眾所真知灼見如伏生之流者卽無庸調試朕亦何妨降旨問難經義或加恩授以官階示之獎勵乎著大學士九卿將見舉人員再行虛公覈實無拘人數務取名實相孚者確舉以聞如果眾所共信卽可不必考試若仍迴護前舉及彼此瞻徇則尤重負尙經學求真才之意獨不畏天下讀書人訾議與後世公評耶○戊子實授永貴浙江巡撫○辛卯命壬申年 皇太后六旬萬壽特開鄉會恩科○壬辰諭保舉經學之陳祖范吳鼎梁錫璣顧棟高旣據大學士九卿等公同覆覈眾論僉同其平日研窮經義必見之著述朕將親覽之以覘實學在京者卽交送內閣進呈其人著該部帶領引見在籍者行文該督撫就取之朕觀其著述另降

諭旨或願赴部引見或年老不能來京者聽其著述不必另行繕錄致需時日啓勦襲粹辦贗鼎涸珠之弊○甲午諭京師玉泉靈源濬發爲德水之樞紐畿甸取流環匯皆從此濬注朕歷品名泉實爲天下第一其澤流潤廣惠濟者博而遠矣泉上有龍神祠已命所司鳩工崇飾宜列之祀典其品式一視黑龍潭該部具儀以聞尋議春秋祭品禮儀均與黑龍潭龍神祠同從之

六月己亥諭張之浚自簡任山西按察使於任內應奏之事未有建白今甫具奏摺乃以所作治平綱目二十四疏一冊進呈無非剿襲習見之陳言不知爲治之要惟在體以實心措之實政其研求義理莫備於聖賢之明訓儒先之格言苟不能見之躬行雖日取六經性理之書而莊誦之時時布之詔令宣示臣民其於實政何裨况區區膚淺支離之贅說乎此在詞苑諫垣專以論思獻納

爲職者敷陳己見或可效觸目警心之一得尙不許撝拾浮辭至
內而尙書侍郎外而督撫藩臬則政理各有專司民生吏治職有
應爲者盡心力而爲之猶恐不給苟徒以剽竊空言相尙其貽誤
官守尙可問乎千秋金鑑錄歷代名臣奏疏等書鈔之不可勝鈔
蹈成說而錯舉之其卽可謂之名臣乎且伊身爲臬司所司者刑
名也竊舉其在憲言憲而首以刑措爲題夫唐虞之書言刑者非
一所重在明允耳措豈易言至謂官吏遲延胥役擾累訟師煽誘
此入仕者所共知更何待言而究其祛弊之道了無實際至請將
人倫之理欽定五章令僧道刊之爲經喇嘛譯之爲教欲以通曉
番苗則外謬更出情理之外矣他如謂樂律有關風俗欲使士子
鼓瑟吹笙典樂教習之法不傳久矣舍禮義之教而冀感動以聲
音其可得乎又謂御卽馬射今之書生能馬射者幾人亦何必使

能馬射其餘悖謬妄誕之語不可勝舉臬司統轄通省刑名有整綱率屬之責張之浚識見如此何以勝任念其尙非大過著仍以道員用其書著擲還山西按察使員缺著唐綏祖補授○疏濬京城內外水道○癸卯冊封貴人巴林氏爲 穎嬪陸佳氏爲 慶嬪○乙巳諭吳鼎梁錫璵所著經學各書著派翰林二十員中書二十員在武英殿各繕寫一部進呈原書給還本人所有紙札飯食皆給之於官著梁詩正劉統勳董理其事○丙午追賞廣西殉節巡撫馬雄鎮等世職○授保舉經學之吳鼎梁錫璵爲國子監司業○丁未諭雲貴總督碩色奏報緬甸遣使入貢朕思緬甸越在荒裔自前明嘉靖後職貢不通我朝定鼎之初卽能擒送朱由榔傾心效順茲復專遣陪貳齋表闕廷向化奉琛具昭忱悃向來蘇祿南掌等國入貢筵宴賞賚俱照各國王貢使之禮所有緬甸

貢使到京一應接待事宜亦應照各國王貢使之例以示綏遠○
戊申以官兵進藏免沿途番民本年夷賦之半○辛亥撥湖廣倉
穀二十萬石於浙江備賑○庚申 上御太和殿受緬甸國使臣
朝賀○辛酉諭江西巡撫舒輅奏請分晰江省賑恤事宜一摺內
稱江西省夏月溪澗水發爲患例係有貸無賑乾隆七年以前地
方官隨時籌辦或動閒款或自捐貲通報查覈今則無論夏秋一
遇水發地方官卽攜銀前往撫恤在小民以爲例當如是望恩幸
澤無有饜時所費實多無益亦於風俗有關見擬分晰辦理等語
舒輅此奏非是地方偶遇旱潦雖屬偏災而所關於民瘼者甚重
竭力補救尙恐小民或有向隅督撫身任封疆正當隨時體察先
事綢繆豈得因愚民望澤無饜豫存裁抑之見況今當國家全盛
之時中外乂安兵革不試經朕輪免天下田賦一周而大農歲積

甚充卽閒有興作悉給自內府並不動支正供實可云庫有餘帑
食有餘粟何必以一方偶需賑恤總總計較且朕宵旰勤求恫瘝
在己時切於懷亦何忍以嗷嗷代哺之窮黎擗節鎔銖升斗之米
卽慮時有冒濫亦止應嚴飭地方有司辦理妥協俾實惠及民毋
令中飽滋弊而已至奸徒因事造端逞強肆橫自應盡力懲創以
儆刁風督撫之盡心盡職正在於此若云多費錢穀則所損於國
儲者無幾而災黎之所全實多豈得謂之無益爲督撫者苟如此
居心必致貧民失所殊非朕委任司牧之意舒輅著嚴行申飭將
此通行各督撫知之○辛酉諭據新任廣東按察使丁廷讓奏稱
伊母年逾七十兩弟皆已病故侍養無人前於福建鹽道任內曾
詳明該督撫該督因赴浙迎駕擬俟回任奏聞適奉新旨等語其
情殊屬可憫丁廷讓著改補江西按察使所遺廣東按察使員缺

著徐以升補授○壬戌命暫弛浙江海禁仍免各關米稅

東華續錄

乾隆三十四

臣王先謙敬編

臣周倫蕃恭校

秋七月乙丑朔禮部奏 祈穀壇扁額舊書 大饗殿字門名亦同謹按大饗之名禮經皆指季秋報祀而言與孟春祈穀有異請別定尊名以昭盛典得旨改 大饗殿爲 祈年殿門爲 祈年門○丙寅諭尙書孫嘉淦以所著詩經補註閒日進覽於興觀羣怨之旨頗有發明朕亦時折其中從此舊萃成編足備葩經一解孫嘉淦請開館纂修朕以爲無事更張見在軍機大臣等逐日有進呈繙譯五經四書其平定金川方略亦將次告竣著就此館局以傅恆來保孫嘉淦充正總裁官舒赫德納延泰汪由敦劉綸充副總裁官或需用纂修人員令孫嘉淦舉素所知一二人奏聞充

補則幾務之餘可資佩文而以次成書亦可以詔來學○庚午軍機大臣等議奏臣等遵旨將民間禁用銅器一事與總督尹繼善悉心酌議竊思制錢日用所需欲錢法流通市價平減必先使銅無耗民間販銅有限用器無窮其出於私毀明甚今請銅器之見在民間者仍聽民用不必收買以致抑勒交官之弊惟此後毋許復造銅器鋪及工匠等悉令改業已成器者定限變賣至未經成器及民間廢銅願繳者州縣設局就銅之高低定價之多寡隨到隨收第從前但禁黃銅奸匠將諸銅攙和染色制錢仍可銷毀且紅銅加以倭銅卽成黃銅弊端未絕並請無論紅黃白銅槩禁制器從之○辛未諭江蘇巡撫王師奏元和縣知縣王名標蠲升貴州永甯州知州該員操守謹慎才具幹練懇將王名標以升銜暫留元和縣任遇有江省相當知州缺出酌量題補等語元和省會

首邑王名標人地相宜以升銜仍留原任於理尙屬可行但既留任遇相當知州缺出卽行題補又須離任仍於該地方未有裨益轉啓規避之端朕思守令久於其任可以勵官方而收實效既准予升銜已合古增秩進階之義嗣後知縣籤升外省督撫奏留本任者俟留任五年內遇有相當之知州缺出題補如首郡知府升任道員該督撫題留者視此著爲例王名標卽照此例行○王申

上奉

皇太后啓鑾秋獮木蘭○癸酉免經過地方本年額賦十分之三本年被雹地方十分之五○戊寅 上奉 皇太后駐

蹕避暑山莊○庚辰

上奉

皇太后自避暑山莊巡幸木蘭行

圍○辛巳張坦熊以不職革職以周琬爲雲南按察使○乙酉免奉天甯遠州八年九年民欠○丁亥免八旗病故人員紅事借俸銀兩著爲例○移貴州貴西道駐威甯州

八月丙申諭據王師奏保舉經學之陳祖范顧棟高年力老邁不能來京等語陳祖范顧棟高俱著給與國子監司業職銜以爲績學之勸所有著述留覽○撥湖南倉米十萬石於浙江備賑命截漕以補倉儲○徐以升以不職革職以汪德馨爲廣東按察使○戊戌諭軍機大臣等據雲貴總督碩色摺奏本年七月初一日接古州鎮總兵宋愛密稟內稱六月二十二日據駐安順府提塘吳士周呈稟內另有密稟一紙詞殊不經查係本月初八日有赴滇過普之客人鈔錄傳播見卽著落提塘吳士周跟追閱密稟所鈔傳播之詞竟係假託廷臣名目膽肆訕謗甚至捏造殊批種種妄誕不一而足顯係大惡逆徒逞其狂悖不法已極等語著傳諭步軍統領舒赫德直隸總督方觀承河南巡撫鄂容安山東巡撫準泰山西巡撫阿思哈湖北巡撫恆文湖南巡撫楊錫綬貴州巡撫

開泰令其選派賢員密加緝訪一有蹤迹卽行嚴摯奏聞請旨勿
令黨羽得有漏網務須密之又密不可稍有張揚洩漏○命安徽
截漕六萬石備明年平糶○命浙江截漕五十萬石備賑○辛丑
命江蘇截漕三十五萬石備明年平糶○癸卯 上奉 皇太后
駐蹕避暑山莊○己酉 上奉 皇太后自避暑山莊回鑾○命
再截留江蘇漕糧三十萬石於浙江備賑○辛亥諭金朝陵寢近
在房山歲久榛蕪未經修葺朕惟企太祖金世宗功德載在史書
景仰傳之奕禩我 世祖章皇帝 聖祖仁皇帝隆禮有加並
御製碑文勒石建亭以垂不朽顧念國家祀典光昭雖以時遣官
將事而一切享殿繚垣儀制所存觀瞻宜備其令直隸總督方觀
承前往相度應增修除治者卽行奏聞率屬鳩工庀事工竣之後
朕將躬親展奠以昭敬禮前朝之意○丁巳 上奉 皇太后遣

京師○庚申諭昨據雲貴總督碩色摺奏滇省傳播僞撰孫嘉淦奏本逆犯應交各省緝拏茲據山東按察使和其衷摺奏本年四月間訪問省中傳播僞造孫嘉淦本藁一紙肆行誣謗隨加根究來歷得自江南水利廢員當卽稟明該撫準奏請一面奏聞一面咨明江南督撫嚴加查緝乃準奏以無庸深求亦不必具奏將原稟勾抹發還改爲拾自途中擬杖完結近奉旨緝拏滇省傳播僞造孫嘉淦奏本逆犯準奏並不將鈔寄原底發看且諭令不必牽涉前案等語是此案四月間在山東發覺卽應根究且無論廢員卽見任之員苟犯不道誹謗之罪亦惟應嚴拏治罪而已準奏身任巡撫平日一味取巧因循已不能稱職及見此誣謗悖逆之詞竟至忍心隱匿實出朕意料之外及至蔓延滇省奉旨查拏逆犯尙論該按察使不必牽涉前案明係因從前逆犯房餘一案曾經

梅穀成參奏今此案與房鉉之誣謗如出一轍恐由伊根究得實
又招庸愚無識者之營議則是惟知自顧己私遂置君臣之義於
不問且此等夢囈譸張之詞卽朕寬大不令深究獨不思爲風俗
人心之大害乎封疆大吏居心若此國法實不可容已著侍郎兆
惠馳驛前往將準泰革職拏問所有摺內情節逐一徹底確查山
東巡撫員缺著鄂容安調補速行赴任鄂容安未到之前著兆惠
暫行署理鄂容安接印後兆惠卽將準泰押解來京○調舒輅爲
河南巡撫鄂昌爲江西巡撫以楊應琚爲甘肅巡撫○河南陽武
縣河溢○辛酉江蘇巡撫王師卒子祭葬○以莊有恭爲江蘇巡
撫由戶部選○壬戌追賞原任江蘇巡撫王師祖父母父母封典○
調汪由敦爲戶部右侍郎以裘曰修爲兵部右侍郎由詹事選○以吳
士端爲甘肅布政使武忱爲陝西按察使由河東鹽運使選○癸亥分京

師八旗米局爲左右二翼總理大臣三年更代

九月丁卯以蔡新爲內閣學士

由翰林院侍講學士遷

○戊辰諭軍機大臣

等兆惠摺奏訊問準泰供詞尙多支飾兆惠未加詰問不足以服準泰之心卽如供稱和其衷面稟先將謗傳之人發落和其衷自稱意見相同似和其衷原不欲徹底根究但在當時卽果有此情節而和其衷之面商無憑準泰之塗抹發還確有實據卽當詰其塗抹何心發還何意且和其衷係同辦此案之人並非從未見此稟恐其張揚彼旣於發覺之初卽將僞稟呈明則準泰亦應於奉到廷寄之日將原稟發看立將前案供明之官貴震咨提嚴訊則無著者卽可有著乃和其衷一接準泰札寄密諭卽自知前案辦理之謬據實奏聞而準泰仍令不得牽涉前案並不封發原稟始終含糊希圖苟且了事又屬何意此皆案內緊要情節何以不行

詰訊著傳諭兆惠將指出之處逐一研問如已押解來京一面卽於途次將此旨傳諭準泰問其是否心服○壬申工部侍郎劉綸丁父憂賞銀三百兩治喪○調張泰開爲工部侍郎○丙子 上奉 皇太后啓鑒謁 泰陵○丁丑命撥江西倉米三十萬石於浙江備賑仍截留漕糧十五萬石撥補○琉球國王尙敬送歸內地遭風商民優資之○庚辰 上奉 皇太后謁 泰陵回鑾○命暫弛奉天海禁准山東商民販運○壬午兩江總督尹繼善奏前奉旨密拏傳播僞黨官貴震並授伊家書札得捏造孫嘉淦本藁一紙又有山東按察使和其衷幕友劉宏謨密寄官貴震之親戚鄭鶴年札內稱據沂州府稟獲譌傳僞藁之犯劉恆發究明鈔得白官貴震請咨江省解審當卽詭詞向東家云官貴震係我至親求與撫軍商酌將劉恆發供詞改爲拾自途閒無從根究得以

從輕歸結等語是官貴震之橐底流播東省先有劉恆發一案敗露從輕寢息非止和其衷所奏李僕一案也細按劉宏謨札內情形僞橐出自官貴震之手無疑見親行嚴訊堅不承認並牽涉多人因密札山東撫臣令和其衷交出劉宏謨押解江省質訊定擬另奏伏思此案早據沂州府獲犯供明鈔得自官貴震乃和其衷準泰通同瞻徇刪改供詞草率完結實爲溺職負恩而和其衷聞各省傳播恐事敗露始將李僕供出官貴震情由奏聞希圖掩飾更爲巧詐一併據實參奏諭尹繼善參奏和其衷先於劉恆發傳鈔僞橐一案聽從幕友劉宏謨密屬刪改供詞從輕完結等語東省此案朕初意準泰先有成見希圖苟且了事和其衷雖隱飾於前尙據實陳明於後雖有心取巧或實屈於外官院司體統不得不然情理尙在可恕是以準泰案內未將和其衷治罪今據尹繼

善所奏則和其衷已先受幕友密屬適準泰以無從根究相商正合其意遂從輕完結轉向幕友市恩而準泰之塗抹發還實墮其術而不知迫事不可掩則專卸過於準泰設準泰當初欲根究入告和其衷必且代爲求寬矣其居心陰險譎詐一至於此罪更浮於準泰著該撫鄂客安即將和其衷革職拏問解交刑部一併嚴審定擬具奏○癸未 上奉 皇太后還京師○甲申命尙書舒赫德赴江南查辦僞造奏囊○丙戌以阿爾泰爲山東按察使由覓道選○戊子子經壇祝嘏之前辛未科進士原任詹事黃叔琳侍郎銜原任侍郎王景會等分別加級復銜○己丑諭山西布政使多綸奏請酌更外省壇廟主祭之官以肅祀典一摺似有所見布政使雖地方正印究係督撫屬員況督撫正封疆大員安得謂非地方官至道員駐紮之地以州縣印官主祭其品秩相懸爲之踈

踏不安何以嚴對越而重祀典乾隆二年所定之例過於拘泥著該部另行定議具奏尋議嗣後壇廟春秋祭祀省會令督撫主祭布政使以下陪祀其有道員駐紮之府州縣地方亦令道員主祭府州縣等官陪祀揆諸各省丁祭督撫主祭之例亦歸畫一再督撫道員僅遇出巡時仍令布政使及該地方正印官攝祭至將軍都統提鎮等均係武職仍照舊例陪祀從之○諭今日刑部查奏秋朝審內侵盜錢糧官犯陸開江等各案將著落該上司分賠情由敘入殊屬錯誤朕於侵盜劣員定以重辟申嚴限期者原以儆貪邪而肅法紀初不爲錢糧起見前經屢降諭旨其定例上司分賠不過因其瞻徇屬員不早爲覺察以致屬員恣行侵盜耳若謂帑項有著可即將本犯擬入緩決則平日視官帑如己貨肆意糜費至定罪之後恃有上司代爲完項藉以遷延歲月倖逃刑戮劣

員更無所畏懼且使各省轉滋分賠著追之案益覺紛繁是國家以錢糧爲重人命爲輕矣殊未喻朕辟以止辟本意且帶項之有著無著自屬農部職掌法司讞決案內止應於本犯限內完否定其罪名無容牽涉辦理刑名大臣等其悉朕意尋議侵盜錢糧與貪婪事同一律均以二年限滿有無完贓爲斷上司分賠仍與本犯無涉不在完贓之例其畏罪完項者例得邀恩若限滿不完應由緩決改入情實但侵盜各案情罪輕重不同嗣後每年秋審內仍照例按限定擬如情罪有與陸開江等相類者雖限內亦擬情實特將未經限滿處聲明請旨並令直省督撫於所屬侵盜各案初入秋審時卽將限期扣算起止詳細開明以便臨審公同查覈報聞○庚寅陳大受卒調阿里衮爲兩廣總督以永常爲湖廣總督由安西○辛卯諭兩廣總督陳大受才品優長精明勤慎敷歷

中外倚任方殷前因患病奏明暫交督篆隨經降旨令其在署調理以冀速痊忽聞溘逝朕心深爲軫惻著入祀賢良祠以獎賢勞其應得卹典著查例具奏尋子祭葬諡文肅賞給三代封典予其子陳輝祖一品廕生

冬十月丁酉諭刑部進呈湖廣秋審本內斬犯滕有伯該撫原擬情實具題九卿會覈以其救母情切改入緩決殊失輕重滕有伯棍格致斃大功服兄從前三法司按律覈覆擬斬立決經朕降旨改爲擬斬監候免其卽行正法是該犯救母情切之處已邀格外寬典矣若於秋審之時復擬緩決僅虛予以重辟罪名久且入於矜減之列是乃輕視倫紀豈明刑弼教之意此端一開將使挾仇干犯者轉以父母爲起釁之由得肆其毒手愚民益無畏懼且各省督撫以九卿既經改擬凡屬此等案件必有以緩決爲請者九

卿因其情節稍重又必有改爲情實者而言官復援前案相較益致聚訟紛紜非所以明法紀而崇簡要也嗣後由立決改爲監候人犯俱應入於情實句到時卽或原罪免句下次亦應仍入情實或情節果輕免句數次之後遇特旨寬減則可耳法司惟應執律問擬此所關於人倫國憲者甚鉅將此諭問刑衙門知之○戊戌楊錫紱丁憂以范時綬署湖南巡撫

由湖北布政使署

○己亥諭鄂敏著

更名鄂樂舜湖北布政使員缺卽著鄂樂舜補授所遺四川按察使員缺著宋壽圖補授○甲辰諭安徽江蘇被災州縣米石折賑例價外加給銀二錢○復各省冬季行圍例○定圓明園水操事宜○乙巳諭四川總督策楞奏川省開採礦廠須大員專理請將川北道周琬與建昌道倉德對調周琬已升雲南按察使見據該員以母老獨子呈請仍留道員懇以升銜調建昌道加銅政銜專

司廠務等語四川按察使鄂樂舜升任員缺已有旨令宋壽圖補授宋壽圖見在滇省著卽補授雲南按察使周琬著調補四川按察使兼理廠務○丙辰調陳宏謀爲河南巡撫舒輅爲陝西巡撫由江○丁巳命撥京倉米二萬石分給五城平糶○尙書舒赫德兩江總督尹繼善奏審訊劉宏謨等供官貴震與鄭岐山撰造偽稟一案據供前在東省因刑逼誣供並無確據鄭岐山係捏造之名實非鄭鶴年今遵旨將官貴震等解京備質報聞○己未雲南巡撫愛必達奏採集番字鎮沅府之焚夷普洱府之車里東川府之裸羅順甯府之猛甸猛麻永昌府之耿馬鎮康潞江芒市猛卯遮放干崖南甸蓋達隴川孟連灣甸猛猛等一十八種內遮放與猛卯二種蓋達隴川與南甸三種猛猛與灣甸二種字體相同分彙成書一十四本進呈下部知之

十一月甲子朔署兩廣總督蘇昌等奏照會安南國王接領夷人阮玉漢等該夷官回文認領附稱有莫氏餘孽聚徒爲匪捕獲渠首莫成陳供稱伊祖父等見僑內地泗城請爲查訪查莫氏後裔於乾隆六年在泗城滋事移安徽省安插今恐泗城尙有遺種越界搆讎應密行查明諭軍機大臣等蘇昌定長等奏安南夷官請查莫氏人口一摺意欲卽爲查辦所見非是莫氏旣居泗城卽屬內地百姓前此據伊來文辦理已屬一之爲甚今又據夷官來文爲之查辦此端一開竟成常例設或展轉移查將沿邊州縣日爲屬藩查拏人犯旣於天朝體制未協且恐從此漸開邊釁應明白曉諭以乾隆六年將莫氏後裔遷徙安插此乃撫字小邦格外恩典見在邊圉甯謐該國陪臣惟應安靜自保不得借莫氏遺裔爲詞屢向內地查訪啓恃恩滋事之漸如此則明白正大自然折服

其心至嚴飭邊防不令內地匪徒偷越構釁自是封疆大吏分內所應辦又不當因有屬國文移始行整頓也將此諭令蘇昌定長知之○庚辰陽武決口合龍○癸未定邊左副將軍親王成衮扎布奏據驍騎校齊克慎等密報十月十四日有厄魯特庫本等六十人來縛去貿易回眾及厄魯特人等五十餘人詢據回人巴起稱台吉喇嘛達爾扎夏閒遣人往額爾齊斯地方喚達瓦齊達瓦齊不敢往與台吉達什策凌烏巴什議於九月十二日投奔大皇帝達什等密告喇嘛達爾扎至期集兵五千將達瓦齊屬下三千人擒獲一半並此處貿易之達瓦齊屬下人縛去等語又詢貿易來之厄魯特錫喇卜據稱今年秋喇嘛達爾扎差宰桑博和勒岱往喚達瓦齊議事達瓦齊不奉命喇嘛達爾扎遂遣博和勒岱鄂勒哲依二人帶兵一萬往擒達瓦齊知之議於九月二十六日

前來投誠後聞博和勒岱等兵將到遂於二十二日帶兵五千行至和通哈爾垓地方策凌烏巴什領兵追戰旣敗猶帶殘兵尾追而博和勒岱等兵萬餘在納林布魯爾河阿爾台山梁邀截此時未知如何等語臣已密諭各卡加意防範如有投誠來者酌量情形辦理諭軍機大臣等達瓦齊乃準噶爾大策零敦多卜之孫在彼處眾台吉中較爲強大今與伊台吉喇嘛達爾扎不合前來投誠若論與準噶爾和好自不應收受然議定疆界時並無彼此不留逃人之條且自康熙年間以來收來此等之準噶爾人不知凡幾今若不收達瓦齊等是絕伊歸路矣著寄信成衮扎布等達瓦齊若投入我邊卡實係力窮懇求收養著加恩給與口糧及騎馱牲口量爲接濟照去年薩喇爾等投來之例將達瓦齊及屬下緊要頭目揀選數人先行馳驛送赴京師其餘人眾照例妥辦候旨

儻未入我邊卡之先豫使人來懇求接濟則斷不可應付恐墮準噶爾詭計再此際達耳齊實係率眾投誠與否一得實信卽行具摺奏聞○甲申免河南辦運堵築工料民田額賦○乙酉加上

皇太后徽號曰 崇慶慈宣康惠敦和裕壽皇太后○丙戌命高

斌汪由敦會勘天津河工○戊子 皇太后聖壽節 上奉 皇

太后御慈甯宮率王大臣行慶賀禮 御製 慈聖萬壽九如頌

九章○壬辰截留河南漕糧五萬石於天津北倉備糶

十二月丙申命整肅朝儀○丁酉命挑永定河下口引河○戊

戌 上臨和敬公主和婉公主第○貸船廠渾春地方本年水災

旗戶○壬寅諭浙省今年春旱成災本重巡撫永貴竟至張皇失措茫無定見於附近之江南江西福建湖廣山東等省旣四出告糶不已甚至欲委員遠赴奉天採買米糧且稱賑糶所需必得三

百萬石之數方足以資接濟從來辦理賑務斷無因一省中數府被災遂欲竭數省之力以供其用者故朕降旨訓飭乃近聞永貴在浙竟至有心諱飾將來於賑糶諸務必欲多所撙節則是該撫從前並非爲民總屬爲己其意不過欲多得米石遂可有恃無恐縱事竟不行亦得藉以謝災黎且以杜朕責防人彈封疆大吏豈宜如此存心耶然朕猶以爲爲百姓起見不防姑留以觀後效是以御史范廷楷以徇庇劣守金洪銓參奏朕亦止降旨飭行以辦賑之妥協與否定其去留今乃一變而有諱災之意是其辦賑不妥矣則徇庇之罪亦應並論且朕子惠元元痼瘵在抱一切政務雖寬嚴時酌其中至於賑恤災黎每不惜加恩格外則十六年如一日此天下臣民所共知者若以永貴一人之辦理不善竟至災民失所大非朕勤求民瘼本懷矣且使各省督撫聞風效尤漸啓

諱災之習所關於民生休戚者甚鉅實難再爲姑容永貴著革職來京候旨其浙江巡撫員缺著雅爾哈善補授見在該省尙有應辦災務著卽馳驛前往妥協辦理○甲辰命修濬南北兩運減河西年卽屆選拔之期惟是來京朝考揀選引見劄監讀書或以知縣等官試用或以教職卽用或以教職歸班序選條例屢經更定朕思選拔於每學數十百人中拔取一二人且不糊名易書可以驗其人才覈其素行自當精擇以充其選應令該學政於試列前茅之士舉其文行兼優才品出眾者會同該督撫秉公掄採以杜濫觴至庠序爲陶育人才根本今教職率多昏耄龍鍾濫竽戀棧雖定以六年甄別而上官以閒曹多方寬假非國家設以敷教本意應分以年限詳加激汰所遺員缺卽以應授教職之選拔充補

於士風當有裨益所有選拔貢生赴部驗到作何定限及朝考錄用一切規條俱應詳悉酌定永著爲令大學士九卿集議以聞尋議各選拔赴部應以該年十月起限雲南貴州四川廣西廣東甘肅限次年五月到部湖南福建江西浙江湖北陝西限次年三月江南河南山東山西奉天直隸限次年正月其有患病事故者許呈明咨部朝考法除前項選拔補考人少仍照向例在禮部考試外其新選拔應照擬定期分爲三次由禮部奏請 欽點大臣於午門內考試擬定等第進呈卷分三等不入等者本生斥革發回原學該學政及督撫府尹一併議處再向例朝考後禮部會同九卿揀選引見有奉旨以知縣及知縣以下等官試用者餘劄監肄業三年期滿以教職選用其考取景山等處教習期滿引見候旨分選知縣教職歸本籍肄業者遇考職之年准考取州同州判

縣丞有願就佐貳及教職者以直隸州州判復設教諭選用乾隆

二年議停今請照舊揀選一二等引見候旨簡用從之○禁苗人

充補苗疆額兵○以鍾音爲戶部右侍郎由盛京刑部侍郎選輩邦達爲禮

部右侍郎由內閣學士選○辛亥以富森爲盛京刑部侍郎由通政使選錢維

城爲內閣學士由翰林院侍讀學士選○甲寅軍機大臣等議覆宗人府襲

封舊例除親王郡王世職不降外其貝勒以下遞降至入八分輔

國公及不入八分遞降至奉恩將軍均世襲罔替如本身襲封奉

國將軍嫡子降奉恩將軍餘子亦封奉恩將軍其奉恩將軍之嫡

子嫡孫例得襲封此外皆爲閒散宗室今按會典一等二等三等

奉國將軍嫡子仍襲封父爵餘子均封奉國將軍在應襲奉國將

軍之嫡子不過較向例增一等而餘子之應封奉恩將軍者世世

加增撥之親親之殺義覺未協再查不入八分鎮國公嫡子例降

不入八分輔國公不入八分輔國公應降三等鎮國將軍今會典載不入八分公嫡子仍襲父爵嫡子世世襲封餘子亦世世加增並三等輔國將軍子孫應襲之爵曰遠日多似過於從優茲於封爵新表內並將舊例貼籤呈進得旨著照舊改寫進呈尋奏發會典館遵辦報聞○是歲朝鮮琉球來貢○會計天下民穀數各省通共大小男婦一萬八千一百八十一萬一千三百五十九名口各省通共存倉米穀二千七百三十四萬一千二百七十五石七斗七升四合三勺零